



Rabu, 20 Maret 2024
Ogen: Kuan-kuanen 20:6



Tuhu-tuhu Setia



Nd. Cakap ngerana kerna tambar si mesinteng guna asam lambung bas PA Moria. Bas PA e lit piga-piga kesaksin kerna pinakit asam lambung e jadi tengah-tengah jabu. Ituriken me uga cara erbahan tambar e dengen makekenca. Nd. Minter ninggel-ninggel kerna kai si belasken Nd. Cakap. La terjeng si e isuratkenna pe kerina bahan ras cara pemakenna. Piga-piga bulan kenca si e iturikenna me kesaksinna i bas PA Moria. Nina "bujur ningku man kekelengenta Nd. Cakap erkiteken penurikenna kerna tambar si ndube maka asam lambungku enggo kugejapken reh menahangna. Kubahan, dengen kupaken tambar e sentudu ras kai sibelaskenna ndube, ulihna tuhu terakap kel kuakap." Reh nina Nd. Cakap "puji Tuhan teman ya, adi terakap tambar ena ndai. Aku pe langa bo kucubaken je ndai. Mbera enda kari enggo banci kubahan sabap maun aku pe kumat ka nge asam lambungku." Senina moria melala sieteh, melala enggo sibegi kerna sada ras sidebanna, tapi ndalanken pemeteh e labo kerina kalak ngelakokenca. Sada kalimat bijak ngataken maka *"kesetiaan lebih dari kata-kata, loyalitas sejati akan menghasilkan tindakan."* Ngatakenca maka setia e labo terjeng i bas babah, tapi teridah arah perbahanen, si tetap ncidahkan kesetiaan. La pe kata-kataken tergejap nge arah perbahanen.

Kitab Kuan-kuanen 20:6 ngataken "enterem kalak ngataken ia setia, tapi kalak si tuhu-tuhu setia mesera njumpaisa." Setia ertina la mobah amin kai pe jadi, bagi perpadanen sinjabuken bana bas pemasu-masun. Tetap setia (ngaloken teman geluh) subuk paksa senang entah susah, paksa sehat entah sakit, meriah ukur bage pe ceda ate. La lit dalam kesirangen seh Dibata nirangkenca arah kematen. Kesetian e teruji i bas perdalanen waktu. Erdandanken si e, selaku nande, ndehara ras moria i tengah-tengah gerejanta. Iajuk me kita tuhu-tuhu setia i bas kerina dampar kegeluhenta man Dibata ras jabu.

✎ *"Jadilah Moria si tuhu-tuhu setia"*

